

KUMPUAN
RAM LEH HNAM
HUMHALH

YMA



CHANMARI WEST BRANCH YMA CHANCHINBU KAR TIN CHHUAK. VOL. XXIII. ISSUE NO.45 4th Nov., 2012

CYMA-ah Branch 789 awm

Chanmari West, 4th Nov : Mizoram tlawmngai pawl lian ber YMA chuan kum 77 a tling ta a, a ze pangngai pawl thianghlim a nihna leh tanpui ngaite tanpui kawngah nasa leh tha takin hma a la zel a ni. Mi inpe leh thahnemngait avangin chak takin hma a sawn mek zel bawk.

Tunah hian YMA Branch awm zawng zawng - 789 a ni a, Group - 46 ah then a ni. YMA Sub-Headquarters - 5 a awm a, tichuan YMA member zawng zawng - 388146, Mipa - 231615 Hmeichhia - 156531 kan ni ta a ni.

YMA Sub-Headquarters panga kan nei a, chungte chu Champhai, Kolasib, Lunglei, Mamit leh Serchhip te an ni. Mizoram pawn Assam, Meghalaya, Manipur, Tripura leh Nagaland-ah te YMA Group leh Branch kan nei a. Sajek, Bangladesh-ah Branch kan nei bawk.

Kan hmunpui Central YMA

Local Council

➤ Tunlai hian Gas Agent hrang hrangte hnenah Consumer-te in report tir mek an ni a, Biakkungi Gas Agent a Chanmari West Consumer-te in report hun tur Local Council-in an la rawn puang ang.

➤ Pu RL. Thahnuna Local Council memberin YMA Branch Office Bearer hruaitu hlun (kum 15) chawimawina a dawng hi Local Council in kan lawmpui kan chhuang takzet a ni.

Office Tuikhuahlang, Aizawl hian CYMA Office, YMA Press, Central YMA Hall, YMA Khualbuk leh Free Computer Centre-te a awm a, hengte hi tangkai taka hman a ni.

Central YMA enkawl tur hian president Pu T. Sangkunga, OB mi panga leh CEC-ah mi 57, kan president Pu T. Ngurkhuma telin an awm a, an hnuiah hian Committee peng hrang hrang a la awm bawk. Central YMA hnuiai thawktu hrang hrang hi mi 20 an awm a, Pu Malsawmdawngliana Office Superintendent/Press Manager hovin an thawk mek a ni.

KEIMAHNI

➤ Kan Production manager Pu Valtea pawh Rullam lamah a zin a, dam taka a lo haw leh thuai kan beisei.

➤ Gas kan nei lova Sangtei of Pu Tetea chuan an inah thingpui min lum sak a, hetianga nula fel kan nei hi kan va lawm tak em.

➤ YMA AW Editorial Board chuan hun remchangah outing hun hman kan tum.

➤ Hun remchang hmasaah YMA AW chhutna chei hnum tum a ni.



Vengchhung thenfai thin a ni a, tihnaktu ni lovin tifaitu nih zel tum ang u.

Branch News

➤ Kan Vice President Pu R. Lalhmachuana chu Rullamah a zin a, dam taka a lo haw leh kan beisei.

➤ Branch Executive Member Pu Zonusanga ZOFA programme-a Guwahati a zin pawh dam takin a lo haw e.

➤ Branch Secretary hnen atanga pem lehkha la chhuak tur ten pem lehkha man Rs 5/- ken thin tur a n e.

PEM CHHUAK

1. Pi Lalfakawmite chhungkua chu Pu Chalhlira 'K' Section-te In atangin Chanmariah an pem.

2. Pu Moses Lalrintluangate chhungkua chu Pu Thangvunga 'K' Section-te In atangin Tuirialah an pem.

ELECTORAL ROLL CHUNGCHANG

Electoral Roll revision kal mek chu Ni 20.11.2012 thleng pawh sei a ni a, thun thar emaw insawn emaw duh tan a buaipuitute hnenah la tih theih a ni e.

HRIATTIRNA LEH NGENNA

YMA Park-a chhun leh zan lama ruihhlo ti leh bengchheng siam tunlaiin hmuh tur an awm a, ualau taka ruihhlo ti thinte hi man innih chuan na taka zilh leh in hming leh nu leh pa hming YMA Aw-ah tarlan tum a ni a, ti tawh lo tura ngen leh hriattir in ni e.

Mi inphal tan

Kan Branch YMA chuan Harsatna hrang hrang tawk tan YMA RELIEF FUND a siam a, mi eng emaw zatin he fund tan hian pawisa an pe tawh a, mi harsa tanpui duhna nei chuan pek theih reng a ni. I inpekna leh sum midangte tan aw.



TUNKAR CHANGVAWN

A tawp berah chuan in zain rilru hmunkhatin awm ula, inlainat tawn ula, unau angin inh mangaih ula, khawngaihna nei ula, thuhnuai rawlin awm rawh u.

I Petera 3 : 8

Editorial Board

| | | |
|-----------------------------|--|--------------------------|
| Editor: | J.Lalnangliana | 9862399658 |
| Joint Editor : | Lalchhandama | 9862358347 |
| News Editor : | Thangkhuma R. Lalrinngheta | 9862303135 9862358337 |
| Cir. Manager : | Jacob Lalrinsanga | 9612319779 |
| Production Manager : | Johny Lalthanpuia EVL. Hruaitluanga | 9612359161 9862655426 |
| | R.Lalhmachhuana | 9436151817 |

Branch Office Bearer

| | | |
|------------------------|--|------------|
| President | T. Ngurkhuma | 9436190843 |
| Vice President | R. Lalhmachhuana | 9436151817 |
| Secretary | RL. Thanhnuna | 9436152760 |
| Asst. Secretary | Zairemmawia | 9862385654 |
| Treasurer | C. Lalzarliana | 9436142049 |
| Fin.Secretary | K. Darthantluanga | 9436196071 |
| Adviser-te : | Pu Lalbiakthanga Khiangte Pu Rothuama, Pi Zamanthangi Pu Lalrengpuia Sailo | |

Editorial :

Tunhnaiah hian veng chhungah rukruk thawm hriat tur a awm leh thin a, a pawi hle mai. Chhungtinte kan fimkhur tlan a ngai hle a ni. Hetiang tih ching man chhuah an nih a, kan tlangvalte an chet nat lutuk a hlauhawm avangin rukruk tum loh mai hi kan vengah chuan a tha khawp ang.

Kan sawi zingin kan ziak zing ta hle mai, veng tam tak neih loh Park nuam tak mai kan nei a; mahse, hlim taka lenho nana hmang lova, ruihhlo tihna hmuna kan hmang hi a pawi khawp mai. Zan reiah uang taka zai thawm hi a ngaihnawm hran lova, chuvang chuan a ti thinte chuan sim hmak a tha khawp mai. Naupang atanga upa ber thlenga nuam leh hlim taka kan lenna tlakah siam hram i tum ang u.

Pawl hruaitute leh member tan pawh chauh hun leh intlahdah hun a thleng a, tan kan lak mar hram angai khawp mai, a tawp kan khar tep a ni. Eng hnaah pawh a tawp tawp that hi a pawimawh ber a, chuvang chuan patling taka hnu khar i tum theuh ang khai.

Pathara'n YMA AW buaipui dan a han chhut chhuah takah chuan kan lo hah khawp mai a nih hi, mah se, kan hlim tho mai. Thuziak mi tan chuan kan inhawng reng a ni.

2012 Thuvawn

I awmdan tur chu LALPA chungah nghan la; Amah chu ring la, aman a ti vek ang.

Article :**YMA AW, AW, YMA AW (Part -II)**

Lalnunthara Sailo

Kan Editor hian article pahnih phutchhuah dan kawng a hmu fu a, Pu Chhuanawma'n kar hmasa khan a ziak tawh a, hei! ziak lo thei lovin min siam tak hi.

YMA AW enkawl hi teirei peih ngai pawl tak a ni ve a, issue khat buatsaihna atan darkar 7 vel tha sen a ngai. Kum khatah issue 54x 7hrs = 378 hrs, chutichuan 378 hrs divided 12 hrs = 31.5 days. YMA AW buatsaihute hi YMA leh khawtlang tan kum khat chhungin thla khat ai tam mah an hnatiang tihna a lo ni.

YMA AW enkawl tur hian thiam thil nei nih angai a, thiam thil neite chu nikhatah Rs 350/- hlawh lo chuan chhawr theih anni mang lova, chuti a nih chuan YMA AW enkawl na man hi 5x350x31.5 = Rs. 55,125/- lai a lo ni. Section tina Agent leh a semtute hi hlawh nei ni ta se YMA AW hi Rs 90,000/- vel leh Press a chhut man Rs 50,000/- nen Rs 1,40,000/- lai sensona a lo ni ang. Branch hruaitute hian hetiang a ni tih an hriat avang hian Editorial Board te hi an duat hle reng a ni.

1996 khan Type writer hmang thiam miah lo kha Jt. Editorah min ruat mauh mai a. Pu Chhuanawma, Pu Lalrammauria Khiangte leh Tv. Lalruata Hnamte te hnungzuiin ka inzir chho ve nawk nawk a, kum chanve kan hman zawh hnu kha chuan Type writer chhut leh cyclostyle her kha ka thiam chho ve viau tawh, 'Ber' thla kan chuan kai meuh chuan Cross Word pawh ka type ve thiam hial tawh a ni.

YMA AW enkawl tu zingah kum 11 zet ka tel ve avangin mi chi hrang hrang mize inang lo tak tak ka thawhpui nual hman a. Tlana, 'V' Sect. Secy kha pa danglam tak, thil duh uluk em em mai a ni a, YMA AW kha a fiah loh a hlau hle thin a, cyclostyle hlui lam tawh hman kha chuan a fiah lo a awm duh zek a, Tlana khan zinglam dar 2-ah pawh cyclostyle kha a thiatin a siamtha peih reng a, thawhpui ten a hming lemah kuaibungba an tihpah hial. Pu R. Lalhmachhuana hian YMA bungrua hi a rohin a dim thiam hle a, Editor a nih avangin type writer kha a mawhphurhna a awm liau liau a ni a, chuvangin Type Writer lian chi kha zirtawp zan tin an in atangin kan inah a rawn pu chhoiin a pu haw leh ziah peih thin.

Inzir chawpa cyclostyle her

kan nih avangin stencil kha her bun a awl em em a, zing dar 2 velah cyclostyle a rik deuh buk a, a hertu leh a puitu an ngawi hmak a, inthlahrung takin 'a bung' an han ti fan raih a. Kut zungchal pahnih chauh hmang thiam tan chuan legal paper phek khat chhut nawn leh kha a huphurhawm duh hle a, boruak pawh a rit churh zel.

Khel lova chawlhi zinga chhuah ngei ngei tur buaipui ta nafam chu December ni 23 zante hian kan han buatsaih a, Tlangvalte kha an kang-lang thin hle a, a vauin kan invau bet a, a chhuak ve zel chu a ni. Tum khat chu December Ni 30 zanah YMA AW kan buatsaih a, Taitesena Section aiawha editorial board a rawn tel khan nula min rim san daih mai a, midang khan ko how rawh min ti a, Tv. Lianzawma hi kan koh tir thin a, vawi li kan koh hnuah pawh a lo haw duh lova, a vawi 5 nan tiin editorial board a tel zawng zawng kha a nula rimnaah kan kal a, kan that ve hma hmain chhuah hmanhmawh berah a tang a, a duh aia rei kan rimpui a, a lungawi lo hle.

Thawkhat lai khan Tlangval mahni section loa ngaihzawng nei kha fiam teh-ah kan neih a, Tv. Lalawmawia 'T' hian 'V' Sectionah YMA member fee a pe, Tv. Lalberan 'Ch' Sectionah a pe tiin kan han chhuaha, inngazawng tak tak chauh kan chhuah duh lehngthal a, khang laia tlangval kan fiam thinho tan khan a lo hrehawm ngawt ang, an ngaihzawng neih kan puanzar sak nasa em mai. Chhantea (Ex-MLA) pawh hi a nupui neih dawn khan palai an tirh ten inneihni an bithliah kha an chhungkua pawhin an hriat kim hmain YMA AW ah kan chhuah thawt thawt pek a, a pain inneihni tura kan tinzawn chhinte han Phek thumnaah zawm....

VANAPA

» Ni 3.11.2012 (Inrinni) khan nilengin Indoor Stadium-ah Vanapa Section Sport an nei a, member-te an hlim tlang hle.

» Ni 10.11.2012 (Inrinni) hian High School Field-ah Section Sport chhunzawm leh tur a ni a, member zawng zawng he sport-a tel vek tur hian an insawm.

» Sport neih leh tur atan hruiitute mahni Group member-te sawm vek turin an inchah. Ni 10.11.2012 (Inrinni) a Sport Items neih leh turt:

- | | |
|----------------|------------------|
| a) Football | b) Relay race |
| c) Inhruiipawh | d) 3-Legged race |
| e) Sack race | f) Bamboo race |

» Chhunginte mahni in leh a vel vawngfai theuh turin an inchah a, bawhhlawh pahi motor-ah chauh bawlhhawh pahi thin turin an inhriattir. Ni 30.10.2012 (Thawhlehni) khan nilengin Fatu-in an inhlawh a, inhlawhna siamsaktu Pu C. Thanchungnunga chungah lawmthu an sawi.

» An member NI C. Lalruatkimi chuan ni 2.11.2012 (Zirtawpni) khan Mission veng lamah Pasal a neih san a, an ui viau rualin an lawmpui hle.

» NI C. Lalhrualitluangi (Mami) damlo chu a that chhuah thuai an duhsak.

» An section member-te tan VANAPA NITE pualin Vanapa Chanchin inziahsiaik (Essay writing) an buatsaiah a, Novemberthla chhungin Pu H. Vanlalvena emaw Tv R. Lalrinngeta te hnenah copy 3 theh luh tur a ni e. Lawmman tha tawk tak siam a ni ang.

KHUANGCHERA

» Ni 27.10.2012 (Inrinni) khan YMA Runah Slub chhun hnatlang an nei a, hnatlanga thawk chhuakte chungah lawmthu an sawi.

» Vawiin chawhma inkawm ban hian Sport Organising Committee-te Pu Lalliansanga (Malala) te inah thutkhawm tur a ni a, member-te kal theuh turin an inhriattir.

» An Secretary te pahnih, ZOFA prog. a Guwahati lama zin pawh dam takin an lo haw leh ta.

» Novemberthla chhung hian section sport ropui taka neih tur a ni a, member-te theihtawp chhuaha lo inbuatsaiah theuh turin an inchah.

» Section huam chhunga information mike tha late Property Sub-Comt te'n an siam that sak a, an lawm hle.

CHAWNGBAWLA

» Pu K. Sangkhuma hriatreng nan a nupui Pi Thangi chuan Section YMA chu Rs 5000.00 a pe a, a chungah Section Committee chuan lawmthu a sawi.

» "Pu Chunga Essay Competition" an buatsaiah a, thupuiah "CHANMARI WEST HMATHLIR" (YMA lam atangin) tih a ni. A sei zawng hi thumal 1000 bawr vel tur a ni a, Ni 25.11.2012 aia tlai lovah Section Secretary hnenah theh luh tur a ni ang. Essay ziak tur hian memberte an sawm.

» Ni 13.11.2012 khian member leh YMA chhangte tan Football a intihhlimna buatsaiah tum a ni a, ahmun atang High School Field beisei a ni.

» Section Project hi Ni 13.12.2012 zanah YMA Park-ah a khar tum a ni.

» Section huamchhungah Krismas Carol hman tum a ni a, a hun atan Ni 19.12.2012 zan an ruat chhin a, Carolinaa sum an hmuh hi Section chhung damlo leh mi harsate pual tan a ni.

NEUVA

» Ni 28.10.2012 (Chawlhni) tlai khan section huam chhunga damlo chhungkaw 2 te kan an ni. Hemi hnu hian Section chhung a pem lut tharte tlawh chhuah a ni a, Duty chhunzawm nghan a ni.

» Ni 3.11.2012 (Inrinni) khan nileng a thuthleng rawng kah hnatlang neih a ni a, hnatlang a thawk an tha hle a Committee chuan lawmawm a ti hle.

» Ni 8.11.2012 (Nilaithawhtan)

khian sumtuakna atan section huam chhungah Sangha zawrh a ni dawn a, KG 1 Rs. 150 /- a ni ang. Section memberte tlawmgaih chhuah a lei neigetur a ngen in ni e.

» Section chhunga house number leh name plate nei late siam mek zel a ni a, hmaihpalh kan awm a nih chuan hruiitute hnenah report theih reng a ni.

» Hun remchang hmasa berah Section Sport neih tum a ni a. Hmalak chhoh mek a ni.

» Tui a vang leh tan ta hle mai a. Zuangui khurah insuk, inbul, motor sil, tui Pipe. etc., khap tlat a ni.

Property Committee

» Ni 6/11/2012 (thawhleh) zan hian Branch Committee an meeting loh chuan meeting koh tum a ni a, member te hunawl lo insiam turin an innge.

...Article zawmna

chhuahte chu a, a ti hial a. An inneihni tur nia kan chhuah lah chu an sawn leh ta nghal a, mi chhungkaw thuruk nen lam khan kan han chhuah ta thin a, kan ngamtak nih kha tawrhchhel a ngai dawn hle a lo ni.

Kan cyclostyle hman kha a hluiin a chhe tawh hle a, Nilai zan khawhar lenpuinaah khatih laia kan Branch President Pu Vanlalsawma kha kan titi puia, a ni khan YMA AW te chu a pawimawh a, lei intih chuan kan lei mai tur a lawm, Branch committee-ah rawn thlen ula kan lei mai ang, tiin min sawipui a. Zirtawp zanah YMAAW kan han buaipui leh a, stencil vawi 3 ngawt mai a eichhia a, phek hniih pawh kan zo thei lo a, a tuk inrini-ah Biak Ina Pu Sawma hnatlang lai chu kan kal chilh a, YMA AW hi naktuk chu a chhuak thei lovang, cyclostyle a chhe tlat a' kan zu ti a, ani chuan OB hnatlang awmte a be rawn a, a thar lei an ti tlu nghal a, Cyclostyle thar kan va lei a, mahni ta tur ni hlei lo YMA cyclostyle lei e ti lo khan mahni thil thar lei haw aiin kan hlim haw zawk hial.

Kum tirah Editorial boardte kan han inhmukhawma YMAAW enkawl awlsam zia ti hian kan sawi thin, kutzungchal pahnih leh kut zungpui pakhat hman thiam a tawk. Kutzungchal pahnihin type writer kan chhu boh boh ang a, paper thlehlet leh chhiar nan kutzungpui a rim hle bawk ang, chung zawng zawng aia pawimawh chu men rei theih hi a ni. A ni lah taka '98 inthlanpui result kha inrinni zanah an chhiara kan nghak zel a, chawlhni zing dar 6-ah chuan YMAAW chu kan zo ve thei mai.

1998-2005 inkar kha YMA AW 'hot' ber lai a ni mai awm mang e ka ti rilru thin a, khang hun lai khan article te kha chhuah sen loh kan dawng a, duh kan thlang thin. James-a award-te khan ngaihlut a hlawh hle a. Chutihrualin nula tlangval khan 'kah/fiam' kha an hlaw hle a, keini lah khan kan kah/fiamte an zaha an sen tawn tawnna tham lo tur kha kan chhuah duh der lova. Tum khat chu ka zin bo hlanin YMA AW an buatsaiah phek tinah min kahna thu a chuang a, 'Front page-ah te em chuan in kah loh tur a nia' kan ti dek dek a, zin leh la, a haed-ah nangmah kahna kan chhuah tawh ang an tih meuh chuan ka ngawi dak mai. Computerised hnu lam chu a leng ta lo.

Central YMA

☞ Kumpuan bawhzui tha : Branch :
 1st - Chaltlang Branch YMA
 2nd - Venghlui Branch YMA
 3rd - Bethlehem Branch YMA
 Group:
 1st - Khawzawl Group YMA
 2nd - Tuipuinal Group YMA
 3rd - Saitual Group YMA
 Ramngaw leh Nungcha humhalh tha : Branch:
 1st - Ngopa Branch YMA
 2nd - Bungzung Branch YMA
 3rd - Khawzawl Zaingen Br. YMA
 Group:
 1st - Khawzawl Group YMA
 2nd - Tuipuinal Group YMA
 3rd - Chalfilh Group YMA
 Branch YMA Chanchinbu tha
 1st - MARYMA, Ramhlun North
 2nd - CHANMARIANS, Chanmari
 3rd - VENGHLUI AW, Venghlui
 YMA Chanchinbu la tha Branch te Aizawl khawpui chhung
 1st - Bawngkawn, Copy 487
 2nd - Chaltlang, Copy 361
 3rd - Kanan, Copy 250
 Aizawl pawn
 1st - Saitual Chawnpui Copy 321
 2nd - Vengthlang, Champhai Copy 275
 3rd - Kahrawt, Champhai Copy 200
 Member zat hisapa la tha
 1st - Marpara 87.1%
 2nd - Saitual Chawnpui 81.1%
 3rd - Serchhip Bukpui 53.8%
 ☞ Hivendra leh Ms. Khanna, Plural India, New Delhi te chu lo zinin Central YMA nen thawhhona chungchang an ngaihtuah a, an ni pahnih hi Pu Vanlaluata, Gen. Secretary leh Pu R. Vanlalsawma CEC ten Sailam, Sialsuk leh Samlukhai te tlawhpui an ni a.
 ☞ Ni 2.11.2012 Madanritting Branch YMA, Shillong Silver Jubilee lawmnna hmanpuuin Pu J. Lalsailova, Fin. Secretary chu Shillong-ah a kal.
 ☞ Ni 2.11.2012 E. Phaileng Branch YMA Golden Jubilee lawmnna hmanpuuin Pu R. Lalngheta, Treasurer leh Pu V.L. Chhuanga, CEC te an kal.
 ☞ YMA hruiatu hlun chawimawina dawng tawh zat hi mi 2160 an ni.

HNA RUAK

Computer dawr nghaktu tur, Nula fel tak mamawh a ni. Computer chinchang hria chu duhthusam. Hlawh : Rs 2500/- + Rs 30 (nitin) Dawrah zawhfiah tur a ni e.

CROWN COMPUTERS
CHANMARI AIZAWL
 Phone-0389 2305904

ZOFA NEWS

☞ Song & Drama prog hmangin Ni 25-27.10.2012 khan Lunglei Civil Hospital-ah programme pawimawh tak an nei.

☞ Ni 30.10.2012 (Thawhlehni) khan Doordarshan (Guwahati)-ah Mizo Hnam Lam an record a, ni 31.10.2012 (nilaini) khan luang takin Aizawl an rawn thleng leh ta.

☞ Member-te Film chang tura lo inring turin an inhriattir

VOLLEYBALL MANAGING BOARD

☞ 1st Div leh 2nd Div. tournament tun thla ni 20-24 chhunga neih tur atan inbuatsaik mek a ni.

☞ 1st Div tournament hi Pu Hawla Stadium (Pitarte Tlang) ah khelh a ni ang.

☞ Registered player-te thahnemngai taka practise turin an inchah.

CLINIC CLINIC CLINIC

Mizoram Physio Therapy Clinic
 Ramhlun Venglai P.W.D Peng Bul

Ruh leh tha na, stroke, zeng, nerve tha lo, Spinal Cord Injury, Sciatica, Sports injury, Pre & Post Operative Physiotherapy Treatment (Ruh tliak zai tawh), Cerebral Palsy (C.P), thawk lama harsatna neite tan (Chest Physiotherapy), Bell's palsy (Hmai sawi), Burn (kang vanga taksa kawm leh ser)...etc..etc...

Sorkar hnathawkte tan MR bill theih. Electric current leh Motor Parking-ah buaina a awm lo.

Hetiang lama harsatna neite tan pan theih reng kan ni e.

Timing : 6:30 AM - 8:00 PM
 Contact : 0389 2343344 (O)
 9862357852 (P), 0389 2341350 (R)

Dr. Rebecca Lalrinngheti
 B.P.T, MIAP Physiotherapist,
 Chanmari West, Aizawl.

LOCAL FOOTBALL TOUR-NAMENT SIAM DAWN

Football Manging Board, Chanmari West Sporting Club chuan kum 19 hnuai lam tan Local Tournament kumin chhung ngeia siam a tum, kan veng rawltharte lo inring tura hriattir kan ni e.

Kan hriat angin Inter Branch YMA Football Tournament-ah Pahnihna niin Football-a kan hniam loh zia a lang chiang awm e, amaherawhchu kan Player te en in rawlthar naupang zawk chher chhuah an ngaih zia kan hre theuh awm e. He mi hre reng hian Football Managing Board Meeting chuan veng chhung naupang veng aiawh theitu tur Player talent hai chhuah nan ruahmanna hi a siam ta a ni.

S M S

SMS thawnna tur : 9862358337.

☞ YMA Conference a kan Branch atanga member kan kal that loh chhanah hian Branch hruiatu inenfiah phawt kan ngai lo maw? Chumi zawah section hruiatu pawh... 9774450166

☞ Tunlai hian khawlaiah ui leh ar hmuh tur ava tam leh tawh ve, ran khuahkhirhna dan kha kan hmang leh tawh lo nge, kan bawhzui lo zawk aw? 9862399641

☞ Kan vengina YMA Park tha tak kan neih hi kan va han enkawl tha lo tak em! Ruih hlo tihna hmunpuiah a chang mai dawn.... Branch YMA hian a venhimna kawngah hian chak zawkin hma han la thei se ava lawmawm dawn em!

9774982691

☞ Zu ruih avanga mahni in chhunga buaina siam thinte hian thenawmte tan bengchheng an siam tel tih lo inre teh se, a changkan loh thlak tlat..... 8976354475

**SMS kan dawnte hi Editorial
 Board ngaihdan a ni vek kher lo.**

ZAKAMILLOVA COMPUTER TRAINING INSTITUTE

DAWRPUI:AIZAWL

(Nokia Showroom chung)

FREE ADMISSION

Course zir theihte:

* CCA, DCA, ADCA, Hardware

* Programming Language C', C++, Visual Basic etc

* Zirlaithe'n an duh hun huna an hman turin Internet a awm.

MITDELTE TAN A FREE VEKIN ZIR THEIHANI

* November thla chhunga Admission ti te tan Christmas Gift atan Monthly fee 20% Discount an ni ang Manager - 9856405229 (3-3)

Pu Chunga Essay**Competition**

- Chawngbawla Section chuan
- Pu Chunga Essay Competition
- member pual tan a buatsaik a, ziak
- turin member zawng zawng a sawm
- e. Thupui "Chanmari West Hmathlir" (YMA lamatangin).Asei
- zawng : Thumal sangkhat vel. Ni
- 25.11.2012 thleng Copy thum
- siamin Chawngbawla Section
- Secretary hnenah thelhuh theih a ni.
- Lawmman : 1st prize - Rs 2000.
- 2nd - Rs 1000, 3rd - Rs 500 leh
- Consolation a awm ang.